

Wang untuk sampah

DBKL perkenal mesin kitar semula beri ganjaran wang tunai

Oleh Suraya Roslan
suraya@hmetro.com.my

Kuala Lumpur

Dewan Bandaraya Kuala Lumpur (DBKL) memperkenalkan mesin kitar semula dikenali *Recycling Reverse Vending Machine* (RRVM) yang memberi ganjaran wang tunai kepada pengguna.

Seperti negara barat lain, mesin kitar semula itu memberi ganjaran wang tunai kepada pengguna yang memasukkan barangan kitar semula seperti botol plastik, tin aluminium dan kotak minuman.

Datuk Bandar Kuala Lumpur Datuk Seri Mahadi Che Ngah berkata, sebagai langkah menjadikan ibu kota Malaysia itu bebas sampah serta bersih dan indah, RRVM antara usaha dilakukan Dewan Bandaraya Kuala Lumpur (DBKL) bagi mengatasi masalah pembuangan sampah.

"Ini satu usaha DBKL untuk menjadikan Kuala Lumpur benar-benar bandar bersih dan bebas daripada sampah.

"Mesin ini khas untuk sampah kecil yang boleh dikitar semula terutama selepas kita mengisytiharkan beberapa kawasan sebagai zon bebas sampah," katanya ketika meninjau pelaksanaan RRVM yang diletakkan di hentian bas berdepan Menara DBKL 2 di sini, semalam.

Mahadi berkata, mesin itu akan mengira sendiri nilai sampah yang dimasukkan dan ganjaran wang tunai akan terus dikreditkan ke dalam akaun bank pengguna.

"Saya dapat lihat tadi, satu botol plastik air dinilai lima sen, kita masuk tiga sampah dan jumlahnya 15 sen.

"Ganjaran duit ini akan terus masuk ke dalam akaun bank, langkah ini bagus bagi mengelak berlakunya kejadian penye-luk saku serta usaha yang selamat untuk mesin itu tidak diganggu," katanya.

Ditanya sasaran untuk meletakkan RRVM di beberapa lokasi, Mahadi berkata, dalam tempoh percubaan tiga bulan ini, RRVM akan

diletakkan di kawasan tumpuan orang ramai seperti laluan utama menaiki pengangkutan awam, Dataran Merdeka dan Pintasan Saloma.

"Kita mempunyai data di lokasi yang sesuai diletakkan mesin ini terutama kawasan tumpuan yang kerap membuang botol plastik dan sampah kecil yang lain," katanya.

Mengenai mesin RRVM

boleh menjadi pendapatan sampingan untuk orang ramai terutama gelandangan, Mahadi berkata, perkara itu tidak mustahil dan mesin berkenaan terbuka untuk digunakan oleh sesiapa sahaja.

"Kalau tiada kerja lain boleh juga membantu DBKL membersihkan bandar raya ini, kalau ini menjadi punca pendapatan bagi mereka.

"Mesin ini mampu memuatkan sampah kitar semula dengan kapasiti 220 liter dan ada pengesan selepas tong penuh, akan di-tukar kepada yang baru," katanya.

"Ganjaran duit ini akan terus masuk ke dalam akaun bank Mahadi"



MAHADI ketika melancarkan mesin RRVM di hadapan Menara DBKL 2, Jalan Raja Laut, semalam.
- Gambar NSTP/EIZAIRI SHAMSUDIN